

元詩選

二集下

〔清〕顧嗣立編

元詩選

二集下

中華書局

黃提舉清老

清老，字子肅，其先光之固始人。諱惟談者，徙居邵武。五子各治一經，人號黃五經。清老少治《春秋》，泰定三年，爲浙江鄉舉第一，明年登李黼榜進士。曹尚書元用、馬學士祖常請留館閣，授翰林典籍。尋陞簡閱，遷應奉翰林文字、同知制誥、兼國史院編修官。出爲湖廣行省儒學提舉，至正八年卒于鄂，年五十九。子肅爲文馴雅，詩飄逸有盛唐風，平生多所著述，學者稱爲樵水先生。有《樵水集》、《春秋經旨》、《四書一貫》行世。三山張以寧志道序其詩曰：子肅之於詩，天稟卓而涵之於靜，師授高而益之以超，由李氏而入，變爲一家。其自得之髓，則必欲蛻出垢氛，融去查滓，玲瓏瑩徹，縹緲飛動，如水之月，鏡之花，如羚羊之挂角，不可以成象見，不可以定迹求也。志道與子肅爲同年，好踰昆弟，故能言其妙悟如此。

古詩六章送王君冕歸陝西

名弁，甲寅進士。

麥熟天乍熱，開軒理瑤琴。茲晨有客至，一逕蒼苔深。日出樹影倒，曠坐分綠陰。清談落餘花，松風雜幽禽。君子希道德，永言結同心。

園林步春曉，芳徑澹已開。日出露未晞，孤吟池上臺。虛閣納翠光，硯寒欲生苔。清坐契心賞，白雲時

人來。君子晚相識，南山碧崔嵬。

西山三月春，萬物好顏色。鳥啼自宮商，花開各紅白。滔滔東流水，千里在頃刻。風雨入遠林，苔痕有新籜。雞鳴潮欲上，山月遲歸客。

狂風卷茅屋，遙見溪上山。人生有遇合，離別何足歎。黃鵠將西歸，臨水振羽翰。我有雙明珠，置之青雲端。朝朝復暮暮，照君千里還。

少年處山谷，壯歲游京師。性本猿鶴羣，焉能牛馬馳。曩有採薪憂，挂冠願爲醫。近得聖賢心，讀書甘如飴。習貫已成癖，豈無君子知。

十載宦京輦，田園就荒蕪。茲焉擬歸耕，休馬南山隅。舉酒樹色動，鶯燕一作燕鶯鳴相呼。流水既送君，白雲亦邀余。錦囊可贈遠，愧非明月珠。

訪子威都事不遇

同年狀元。

清曉抱綠綺，來就夫君彈。夫君久已出，野水流花間。石澗度微雨，秋生湖上山。松陰坐永日，心與雲俱閒。人事有離合，白鷗聊共還。

招友人

晨雨洗餘花，塵慮日蕭散。芳草綠如茵，空林坐春晚。遙思江上客，尊酒愧折簡。臨流擷嘉蔬，共此林下飯。

送楊信父歸臨江

自別武夷君，海水落幾丈。當年尊俎地，顛倒疊橫嶂。君從山中來，應見桃花開。秦人笑相語，愧我非仙才。茫茫八極中，雲月秋徘徊。苦吟不出門，孤負黃金壘。劃然西風生，拂我琴邊埃。願從雙白鶴，去去不復回。

送李子威代祀嵩衡淮海三首

天香出金門，春色動遠山。使者持節去，翩如跨雙鸞。崔嵬嵩少峰，卓立乾坤間。中夜南極浮，星河遠天壇。石室有寶書，泉鳴玉珊珊。安得揖浮丘，青雲驂羽翰。

羣生望甘澤，五岳雲氣通。天香落巖谷，瑞靄春冥濛。海潮天際來，金碧森萬峰。劃落紫翠堆，亭亭玉芙蓉。古廟絲竹存，迎神奏黃鍾。空山遞餘響，落花舞青童。

南海祝融宅，汪洋載神州。巨浸涵萬有，元氣何空浮。蒼蒼島嶼間，仿佛通十洲。神魚在深淵，甘霖何以求。朝折若木枝，夕飲桐柏流。萬里一瓣香，豈徒司馬遊。

古樂府三首

君好錦繡段，妾好明月珠。錦繡可爲服，服美令人愚。不如珠夜光，可以照讀書。君好春芍藥，妾好夏池蓮。芍藥多艷色，春風迷少年。不如蓮有實，可以壽君筵。縣縣江上草，鬱鬱庭中柯。人生不相知，有如東逝波。食杏猶苦酸，食梅當若何？衣褐猶苦寒，衣葛寒

更多。豈無千載友，肯聽漁樵歌。

山行二首

愛山不知倦，緩步成幽尋。觀泉度疊嶂，攜日穿層林。睠彼枝上鳥，少憩松間陰。蕭然清風來，發我松下琴。白雲邀我飲，流泉永我吟。曾謂塵中人，不知君子心。

采采巖下菊，菊老花壓地。泉露飄我衣，擷英不盈袂。錚然松子落，林下遠風至。沈吟不成詩，支筇領山意。

古意懷仲章貢侍御二首

娉婷二八女，絕色妙難畫。新妝薄鉛華，照影修竹下。盛年事夫婿，錦玉耀精舍。雖非伯鸞妻，惓然惜春夜。琴餘月當軒，默默倚風榭。寄語東家兒，紅顏莫輕嫁。此首一作《燕中懷古》。

梧桐生高岡，雲氣涵空清。南枝挂孤月，上有蒼鸞鳴。大匠揮玉斧，渾然合天成。置之白玉堂，被之弦歌聲。一彈松風來，再鼓溪月明。子期人已往，青山爲誰情？

送僧定觀歸

詩僧百丈來，復作五臺別。丁然振金錫，桂子落秋雪。山空白雪閒，風息萬籟滅。相思何處無，江湖一明月。

鄱陽舟中聞友人消息因贈

崑崙九天門，玉署青瑣闥。老我煙霞心，參商坐寥闊。十年望春雲，不忍鑷白髮。鴻雁還塞來，頻頻附書札。江湖秋水淺，舟楫苦不達。不知南山陽，梅花爲誰發？

題竹外一枝梅花

仙標何處來？一寒倚寒玉。晴窗見疏林，座上春可掬。山陰帶殘雪，水影兼遠綠。珍重孤竹君，歲寒伴幽獨。

題醫人黃子厚

悠悠溪上山，疊疊山下雲。幽人不出戶，芝草日以春。伯也種丹杏，心與孤鴻輕。仲也擣玄霜，西風林間聲。世降運不齊，病隨人心生。芳草何所無，誰能擷其英。吾宗幼方積，積久用更精。金丹有時合，白日升蓬瀛。

武夷道中

積雨多浮雲，百川合爲一。新晴落花深，草廔没行迹。溪風淡和柔，天宇浩澄碧。諸峰出雲間，淨若露初拭。遲遲策駑馬，稍稍度翠壁。從人不知疲，佳境恣所歷。松間古仙人，燕坐松下石。羽化今幾年，蒼苔滿雙屐。乾坤妙無言，小大自有得。爲我謝羣芳，春風各努力。

福山庵

晨光海上來，雲氣升萬壑。雞鳴落花中，殘鐘度城郭。庵僧戴星出，我自飯藜藿。寧知天地心，但有山水樂。書燈夜搖動，霧氣侵几閣。開扉得新月，欲掩見棲雀。煙霞暫相違，筆硯庶有託。但留松間雪，付與雙白鶴。庭柯換故葉，林竹脫新籜。何日芝草開，挈舟赴前約。

丁卯及第歸和揭經歷見賀詩

兒時見月欲上天，昆侖獨往三十年。山深染得秋水綠，所思忽到梅花邊。螢燈照雪心炯炯，危坐空齋似禪定。落花啼鳥意不驚，澗瀑松風自相應。書成上謁天帝君，半夜挈起扶桑雲。麒麟崢嶸列萬戶，虎豹吳鳳懸千鈞。翠盤八珍爲君薦，劍佩鏘鏘揖羣彥。木天日上五色雲，知有百靈護經傳。春城如海花滿園，狂吟中有白與元。至今風雨飛動意，垂楊起舞花能言。銀潢東流幾時了，松下夢回秋又曉。蒼蒼此意誰得知，蟾闕佳人霜雪皎。

題胡修撰金華雜興小稿

吾聞金華之山東南峰，石壁巉起如飛龍。滄溟盤礴幾萬里，但見扶桑日影倒挂金芙蓉。山中仙人古愚老，青霞落落雲間松。翩然獨去遊無窮，謁帝西上昆侖宮。春苔染水碧於酒，輦路人家插楊柳。金莖露瀉明月珠，散落人間作星斗。君不見西山日上紫氣橫，花下有人調玉笙。太平擬進九成樂，五雲樓閣生秋聲。

上繼學王公

大風卷地沙塵昏，十日不得一出門。眼中俗子浩於海，思欲一見雲中君。雲中之君玉爲節，鵷冠義我照晴雪。振衣驚落琪樹花，片片人間作明月。有時霹靂生風雷，松聲曉落一作失。青崔嵬。衆芳收雨作春色，瑤草綠遍三蓬萊。有時筆端吐光怪，干將生花玉龍蛻。廣寒天上聞步虛，萬壑千崖起秋籟。嗟余困學無所成，仙家幸識黃麒麟。願從輞川覓詩法，白鷗飛入南山春。

送素庵劉總管歸

當年鏽斧出九天，倏如白雲下長川。千峰收雨作秋色，至今梧竹吟寒泉。熙臺重來又三載，干將出匣光不改。冰漿盡貯明月秋，風露冥冥接滄海。海空迢迢行玉麟，霜影蕩漾龍蛇驚。石田歸來紫芝好，策馬更入南山青。漁陽歌兩岐，何如陽春生物物不知。魯人頌泮水，何如弦歌一千里。昆也虎渡河，寬也蒲作鞭。何如樵溪九曲落葉靜，平鋪綠水栽紅蓮。紫微殿前列藩輔，華蓋蒼蒼五星聚。夔龍蹴躡天一方，蟋蟀吟秋桂枝暮。蓬萊楓葉昨夜秋，瑤樓夢覺題金甌。銀河橫空白鸞去，安得追逐鈞天遊。

行路難

奉君七寶鳳凰之繡柱，五色麒麟之錦囊。王母九霞觴中之酒，秦女萬縷爐中之香。去年紅花今日開，昨日紅顏今日老。一生三萬六千日，歡日頗多愁日少。對吳歌，看楚舞，歌舞忽忽變今古。歸去來，莫行路。

送三山張國寶府掾美歸

三山星斗高貼天，三山潮汐走百川。張公平生飲中仙，襟度脫落神飄然。三山神人不敢友，天風吹度金鰲顛。掃清案牘待明月，平鋪綠水栽紅蓮。公庭無人山色落，時有雙燕歸簾前。樵溪夜雨深一尺，城外明朝翠如織。春歸草木不可遮，黯澹已作離別色。離別兮奈何！若有人兮佩女蘿。公不顧兮山之阿，山之阿，滄海渺渺浮雲多。

縣令行

石田海上秋不熱，抱琴人山翠如簇。白雲一榻流水深，獨對青松結茅屋。西風喚起泥塗身，野冠未見天上人。靈丹一粒肯分與，便當負水耕炊薪。

題高都事戴崧二牛圖

東風吹浪翻平林，吳江咫尺移春陰。牧童曉出不知雨，日暮歸去清溪深。一童驅牛涉古岸，草煙慘澹迷目觀。雙蹄湧出層水間，蒼峽蹴翻石雲斷。一童踞策溪中流，溪風不動波悠悠。恍然顧影驚自失，尚疑身跨蒼龍遊。平瀾遠峰結寒色，至今宇宙留墨迹。可憐三子人不識，我欲問之漢津客。

送海東之

海東之，玉關之人奈子何！一朝趨試當大廷，搜奇抉秘如懸河。胸中二三策，發憤精研磨。中山兔毫

渴濡染，綠文臣研出大沱。御卷足揮霍，如見山人秦華江之番。紫髯長戟凍不折，濁流鼓枻冰我我。得官固好好，東之情最真，遂使吾儂日相親。不誇文字雄，退與寒士相推尊。淫哇鄭衛非所云，闔閭城邊種楊柳，柳江柳子子亦聞。我有刻玉書，願與窮朝昏。子若修之可凌雲，不廢世間功與名。況聞子弟功策勳，一門科第凡五人。瓊林之中翺且翔，如此文文而章章。所以青城樵者有歌曰：海東之，兄弟三人如鳳凰。我歌曰：二雛亦復鳴朝陽。再歌曰：二雛亦復鳴朝陽。

登平遠臺鼇頂峰

六鼇簸蕩玄圃碎，三島崩騰失空翠。海風掣斷南山雲，分我滄江半江水。臺南巖谷青岌岌，奇松怪石作人立。山巔恐有風雨來，林徑空濛落花溼。水東岩巔結平綠，積霧飛嵐坐堪掬。蓬萊迢迢幾萬里，一碧天光浸寒玉。吟翁回首看不足，緩步策驢度空谷。誰知咫尺山中幽，望斷殘暉立修竹。

天馬山

溪隨天馬西北行，半空忽見蓮花生。雙鸞欲下却飛去，旌旗引入丹霞城。攀蘿上到猿啼處，恍然曠坐消百慮。千山無人雲氣深，終日徘徊不能去。虛空樓閣時自開，異香忽起三清臺。風吹笑語落天半，疑是神仙跨鶴來。百花潭上春自照，白鹿呼人猿亦嘯。路迷不敢輕問津，恐有賢人隱耕釣。蒼厓九折樵徑通，絕頂可見西崆峒。塵心豁然臂欲羽，竦身直上凌天風。

與索編修士巖訪馬學士伯庸于蓬萊館因觀藤花

昔訪蓬萊館，春烹芍藥牙。重來尋竹逕，久坐落藤花。君欲鳴瑤瑟，予將拾紫霞。鶴吟知雨近，留宿白雲家。

送人之金陵答贈張質夫

林塘殘月曉，松露滴清聲。此日佳人別，空山碧草生。江湖雙白鳥，風雨一啼鶯。解纜春花發，悠悠萬里情。

送歐子歸盱并寄江西諸友

盱水曾游處，燕城獨眺時。雁來惟我在，葉落祇秋知。風雨連今昔，江湖重別離。送君芳草色，千里見相思。

晚春過城西

林塘密葉靜，禽語綠波翻。坐想青雲士，幽尋白石村。西山遙下榻，芳草欲移軒。時有漁樵侶，春風載笑言。

尋故人

適興一尋君，君家在白雲。幽花秋一作春。後見，落葉夜深聞。隨意坐苔石，呼童煮澗芹。不須談世

事，詩思正紛紛。

留別

相尋復相別，把酒意如何？雲石有時合，風湍無定波。此生無出處，一笑對嵯峨。長揖下山去，暮煙浮女蘿。

哭朱教授竹所

日間竹平安，淒然泣白鸞。講堂春寂寂，歸路夜漫漫。前度成虛設，斯文已不刊。些聲雲谷外，落月帶微寒。

興聖殿進史

庚午。

瑤編初進侍清一作明光，日麗龍池晝刻長。堤柳染成春水色，宮花并入御爐香。金壺灑露層階滑，玉碗分冰廣殿涼。矇眊似知天意喜，鳳笙新奏五雲章。

貢闈偶成呈同院諸公

射宮園棘斷經過，閒却秋聲太液波。風定碧簾聞禁漏，夜殘銀燭見星河。仙人共對青藜杖，詞客孤眠白玉坡。弱水蓬萊三萬里，不知何處月明多？

雪夜直宿玉堂

琪樹花生禁漏遲，金莖月色近書闌。白雲入水春無迹，銀漢橫空夜有輝。竹靜似聞蒼玉佩，松寒欲傍綠荷衣。乾坤清氣蓬萊表，獨對天風拂素徽。

寄劉宰鳳溪

玉署芸香課石經，江湖無復舊詩名。日移宮樹春懷友，花落天階曉聽鶯。滄海料應流不盡，白雲安得與同行。君行十八灘頭路，爲說相思萬里情。

七夕偶書

幾葉梧桐暮雨收，綵棚尊俎候牽牛。青鸞西去瑤池冷，烏鵲南飛碧水流。屋角月明三尺竹，河邊雲濕數星秋。天風掃退塵間夢，一曲金徽獨倚樓。

夜宴友人席上有懷志能照磨暮春會同年所作因寄二首

碧池開冰朱夏涼，瑤席倚翠芙蓉香。清歌夜半起秋籟，妙舞風前搖露光。雲行星月遞隱見，雁度河漢相低昂。青山對面隔一水，渺渺長空愁欲霜。

青山林下啼斑鳩，綠楊門前嘶紫騮。落花成陣作春雨，東風淡淡雲悠悠。美人卷簾日在手，胡蝶飛上珊瑚鉤。南山不見筍成竹，擬約滄波同倚樓。

丁丑三月七日會同年于城南子期工部仲禮省郎世文編修文遠照磨學升

縣尹子威主事克成祕書至能照磨子通編修凡十人二首

曾記城南尺五天，重來攜手宴同年。春風遠塞蒲萄酒，明月佳人玳瑁筵。苔上藥闌紅染露，鶯啼柳迳碧生煙。瓊林十載多離別，欲拂金徽思渺然。

川臈浴日金粼粼，垂楊馬嘶三月春。游蜂舞蝶總愛客，飛絮落花時近人。東風吹水入銀甕，芳草爲我鋪綠茵。更催朝露染魏紫，舞袖一拂南山塵。

張志道別都門

竹寺西軒共聽琴，杏花猶記紫囊吟。溪山老我扁舟興，風雨知君萬里心。滄海夜潮銀漢溼，蓬萊春樹碧雲深。三年離別尊前話，傾倒何時更似今。

柳絮風

三月韶光天氣清，游絲舒卷太無情。微飄簾幕當春晝，亂撲亭臺似雪晴。醉臉欲吹新燕弱，舞腰初軟落花輕。江頭點點行人淚，相逐離歌灑客程。

梧桐雨

曾將秋信報人知，又與西風泣別離。病綠滴殘猶有淚，題紅流去更無詩。舊巢鳳冷朝飛遠，古井金寒

曉汲遲。待得楚臺雲散後，却憑琴調寄相思。

天運不已歲時又春學已可乎作自勉詩呈李□初教授諸公

東風一笑可人心，旋瀝新醅對客斟。山色未勻春意淺，梅花已老白雲深。半軒依竹閒聽雨，千里懷人欲抱琴。試問樵溪隔年意，碧波東注渺難尋。

題平翠樓

華樓突兀摩蒼天，青吟飛上神飄然。虛闌六曲拂雲起，蓮峰千仞當尊前。晴嵐帶霧結秋色，修竹過雨鳴寒泉。東風一笑歌石鼓，心期試問金龜仙。

友人擬古樂府因題十絕句

早晚臨妝鏡，秋容怯玉鈿。君心如日月，照妾似初年。
采苕歸來午，花梢日轉廊。綠陰涼似水，不用洗紅妝。
生愛東鄰女，蛾眉畫不如。近來機杼廢，臨得右軍書。
漫道從軍樂，風霜只獨居。三年遼水上，不得一行書。
海上扶桑景，清光日見君。祇愁風雨夜，西北有浮雲。
今夜中秋月，含情獨上樓。辰星三兩點，偏照玉簾鉤。
自見南樓月，頻頻夢楚州。無端今夜雨，祇作小山秋。

露井疏桐晚，風亭碧蕩秋。卷簾山月上，水宿見雙鷗。
堂上春花老，流泉日繞山。願爲雙白鶴，雲路載君還。
天子西巡狩，彤弓錫虎臣。樓蘭何日斬，看汝畫麒麟。

望雲

日出五丈高，白雲浩如海。城郭在雲中，山人在雲外。

憶昔寄子靜弟

憶昔走馬尋丹丘，醉卧白雲溪上樓。黃石橋東兩松樹，一夜水長到梢頭。

海子上有期

金隄晴日共鳴鏹，傾蓋松陰待早朝。數盡荷花數荷葉，碧雲移過水東橋。

懷友時住夏玉泉山

遠水平林翠遶城，秋來風雨動離情。玉泉千尺梧桐樹，月下時聞落葉聲。

登岸書所見寄魏亨道

紫霞搖日花滿川，漁翁不歸鷗在船。白雲悠然渡水去，平野秋色青連天。